

Ilisimatusarnermut Naalakkesuisup Mimi Karlsenip Silap Pissusianik Ilisimatusarfiup atoqqaartinnerani oqalugiaataa

Asasara Naalaakersuisut siulittaasuat, peqataasullu tamassi.

Naalakkersuisut sinnerlergit Silap Pissuianik Ilisimatusarfimmik atoqqaartsitsinermi tikilluaqsinnaagassi assut nuannaarpunga.

Silap allanngorneranik annertuumik sammisaqalernerup ilisimatusarnerullu Kalaallit Nunaat issittullu nunaa imartaalu nunanit tamanit alaatsinaanneqarnerulerput.

Taaqqaarumavara Naalakkersuisut uggorimmassuk Ilisimatusarnermi ministerip Helge Sanderip ullumi tikiingitsoonera.

Naalakkersuisulli nuannaarutigaat Silap Pissuianik Ilisimatusarfik Nuummi pisortatigoortumik ammarneqarmat. Silap Pissusianik Ilisimatusarfik nunat tamat suleqatigiillutik ilisimatusarfigaat, silaannaap allanngoriartornerata taassumalu issittumi avatangiisinut, inuiaqatigiinnut nunallu ataqatigiinnermut attaveqarfiinut sunniisarnerat pillugu. Silap Pissusianik Ilisimatusarfiup sammisassai Naalaakkersut nunatsinni ilisimatusarnermi anguniaagaannut naleqqupput. Ilisimatusarnerup innuttaasut inuunerisa pitsaassusaannik annertusaaqataassaaq, ilisimatusarnerlu inuiaqatigiit ineriartornerannut iluaqutaasinnaasariaqarluni. Ilisimatusarnermi paasisat pitsaasut naalakkersuinikkut allaffissornikkullu aaliangiinernut pitsaasumik tunngaviliissapput.

Silap Pissusianik Ilisimatusarfiup ilisimatusaatit sisamat uku iluaniissaaq:

- Pinngortitaq aamma avatangiisit
- Inuiaqatigiit aamma inuussutissarsiutit
- Teknikki aamma sanaartukkat
- Sisamaraallu taariikkama immikkoortut pingasut taakku imminnut sunneqatigiittarnerat.

Silap Pissusianik Ilisimatusarfik Pinngortitaleriffimmi Ilisimatusarfimmilu inissisimassaaq. Aaliangerneqarsimavoq tassaassasoq ilisimatusaatit assigiinngitsut iluaqutigalugit suliaqartassasoq, sammisallugillu silap pissusiata allanngornerata issittumi pinngortitamut issittumilu inuiaqatigiinnut sunniutai. Silap Pissusianik Ilisimatusarfiup kalaallit aamma danskit ilisimatuui kisiisa inissaqartissanngilai, nunalli tamat ilisimatuui PhD-ngorniarlutillu ilinniartui aamma inissaqartittassallugit.

Pifissaq ungasinnerusoq isigalugu ilisimasani pitsaanerusunik silap pissusiata allanngoriartorerata nunatsinni inuiaqatigiit nutaanik inuussutissarsiorsinnaanerisigut, najugaqarfiit allanngornerisigut, inuuniarnermut atugarisat il.il. eqqarsaatigalugit. Qilanaaraarput Silap Pissusianik Ilisimatusarfiup ilisimatusarnermi, ilinniartitaanermi aamma uppersaanermi qitiulernissaa.

Naalakkersuisut pingaartippaat pinngortitami atuisut ilisimatusartullu suleqatigiillutik issittumi avatangiisit inuiaqatigiillu immiinnut sunneqatigiittarnerat pillugu ilisimasat nutaat pilersissinnaangussammatigut. Naalakkersuisut neriuutigaat Silap Pissusianik Ilisimatusarfiup nunani tamani inuiaqatigiit pitsaanerusumik ilisimasassaannik silap allanngorneranut tunngasunik aamma taassuma qanittumi najugaqarfiit, nunap immikkoortortaani aamma nunarsuarmioqatigiit annerusumik ilisimasaqalernissaannik aqutissiutinissaa.

Silap Pissusianik Ilisimatusarfimmik pilersitsinissaq ilusilerneqaqqaarpoq ilisimatusarnermut ministerip, Helge Sanderip taamanilu Naalakkersuisunut ilaasortaasup ataatsimeereernerisigut. Kingusinnerusukkut danskit kalaallilu suleqatigiiffissaat pilersinneqarpoq. Silap Pissusianik Ilisimatusarfillu 1. maj 2009 professor, Søren Rysgaard pisortaralugu aallartippoq.

Silap Pissusianik Ilisimatusarfik Naalakkersuisut annertuumik neriuuteqarfigaat. Qularutiginnilarput Silap Pissusianik Ilisimatusarfiup pingaarutilinnik atorsinnaasunillu paasisanik saqqummiussaqaartarnissaa.

Periarfissaq manna iluatsillugu Aage W. Jensens Fonde Naalakkersuisut immikkut qujassuteqarfiginiarpaat. Naalakkersuisut nuannaarutigaa aningaasaateqarfiup Pinngortitaleriffiup pilersinneqarneranut ilaneqarneranullu aningaasaliisimammat. Silap Pissusianik Ilisimatusarfiup inissaqalerneranik tamanna kinguneqarpoq.

Naggataatigut ilisimatusarnermut ministerip silap pissusianik ilisimatusarnerup pilersinneqarnissaanut anguniagaqarnera Naalakkersuisut nuannaarutigalugu oqaatigissavaat. Qularinngilarput Silap Pissusianik Ilisimatusarfik pillugu kalaallit danskillu suleqatigiilernerata pilersissagaa tamatta inuiaqatitsinni aaliangiisarnerit pitsaasut aamma piujuartussat pilersinneqartarumaarnissaat.

Naalakkersuisut qamannga pisumik tikilluaqqorusuppaasi peqataasullu tamaasa pilluaqqorusullugit Silap Pissusianik Ilisimatusarfiup atoqqaartinneqarnerani.